

A mo terra

Vogliu sente
Infiarà si l'onda
Lascià l'ombra mea à sulana
Matrà mi a vita à liquore
Sgranà di l'amore ogni stonda...

Ne vogliu accinghje l'universu
Cunfonde mi in lu so battima
Cuntrastà ù l'acella amica
In l'alitu di u mo versu...

A l'ecu di a Tramuntana
Stà la moi terra batticore
Cinna a canzona landana
Pè l'aghje azzure di e cime...

Pè l'aghje azzure di e cime
Sparghjje cun tè a bionde spiga
è fà tundulià le rime
è fà tundulià le rime.

Senti a Filetta

Sposa lu stu silenziu
Sialba issi muri vioti à fiure isulane
Imbotra ti di celi è d'onde è di fureste
Chì u ventu pettina
Di muschi machjaghjoli
À u spuntà di l'albe
Quand'ellu si sbucina u tempu
Una stagione
Di muschi machjaghjoli
À u spuntà di l'albe
Quand'ella si cincina a folla
A to canzona
È senti a filetta...

Dì mi un pezzu di stonda
Quandi a notte desta
U ventu à tiru d'ale
Fà batte un tempurale in li moi sensi accesi
È nasce mille fole in volu versu tè
Inventa mi un ricordu
Tessi lu sinu à noi
Cum'è un granellu coltu à l'oru di a luna
Inventa mi un ricordu
Tessi lu sinu à noi
Cum'è un granellu coltu
À l'ora di u sole

È senti a filetta...

Muntagna

U murmuru biondu
Di lume chì fragna
U mughju prufondu
Di a notte pagna
Vocu in la muntagna

Voce in lu circondu
Pastore cuccagna
Eiu li risponde
Li risponde l'agna
Vocu in la muntagna

Da sopra à Ritondu
Ci spunta l'altagna
In un ballu tondu
U ventu si lagna
Vocu in la muntagna

Pozzu senza fondu
A mente ci bagna
L'anima ci affondu
Vocu in la muntagna

Sò li viaghji

Sò li viaghji mei , sò centu in le to vene
È mi frisia un suspiru, u ventu d'oramai
À e sarre di lume, muscu di la to pelle
Da quindi à u fiatu, u ventu , a carezza
Sò li viaghji...
Ammaestra mi l'ore stracquate pè u sognu
Batti mi in grembiu un celu è di mi u silenziu
Di a vita u trenu fila à cecubughjone
Pè a via ferrata ferita d'arezza
Sò li viaghji...
Di frebba è di dolore issu ghjornu mi cunsoli
Scrittu è da la to manu u fogliu culuritu
Incensu in lu mo core, un mare tenerezza
È basgianu l'albori l'attrechjate surelle
Sò li viaghji...

D'isula nata

Ella d'isula nata
À la prima matina
In pettu à la turchina
A voce si hè spannata

À la prima matina
Solu l'anima amata
A voce si hè spannata
In memoria latina

Solu l'anima amata
È lu tempu in pulvina

À la prima matina
Solu l'anima amata
A voce si hè spannata
In memoria latina

Solu l'anima amata
È lu tempu in pulvina
In memoria latina
Ella d'isula nata.

U mo sognu isulanu

U mo sognu isulanu hè di memoria sciolta
À l'arice di l'esse vanu silenziu arcani
A ferita prufonda in a parolla tolta
Ciò chì a manu conta è facenu le mani

Hè solu un filu appesu à i canti landani
Una stonda preziosa à l'ispensata colta
Issa machja à fior di pelle ritornu à li verani
U mo sognu isulanu hè di memoria sciolta

A vascella si hè persa è navica rivolta
À u marosu mattu è i mari furdani
Verde spechju turchinu chì voca è girivolta
À l'arice di l'esse vanu silenziu arcani

L'amore si cunfonde in i pensieri umani
Sbunurata laziosa in a filetta folta
I sospiri briachi di tanti lindumani
A ferita prufonda in a parolla tolta

Destinu spalluzzatu è ghjunta senza accolta
Mandile sventulatu di l'addii dardani
Issu libru ch'è no aprimu à a pagina volta
Ciò chì a manu conta è facenu le mani

Canzona zitellina da i solchi suprani
Voce linda di lume ardente chì scunvolta
È porta i so nomi à l'abissi luntani
Cù lu to Requiem o mà issu lagnu volta.

U ventu sà

À tempu u ventu s'hà righjaratu e sarre
In l'azzurru scialbatu impinellatu à celi
Una luna hè sbucciata tonda chì pare un sole
Strascinendu si da i silenziu bambace i nuli
E creste frastagliate l'alliscia u mo sguardu
Sò li verdi aliveti rossi più ch'è vaghjimi
È tonanu l'inguerni d'anime scunsulate
Ariulendu in a pace da sopra à a natura
Falcu di lu mio core chì m'insegna è mi cura.

Quandu volti

Mira veranu spampaneghja
Sottu à i celi matuttini !
Senti sbuccià e so canzone
In la notte chì spasseghja !

È u to marosulu in core
Cù lu to stranu rutulime
A sponda chì vene à sfiurà
Quella fola chì ùn vole more

Intricciati sò li camini
Voltanu tutti à l'agnone
È a to machja ti trascini

Da u passu in lu petrìchime
Quandu volti da mare in là
E viole seranu prime...

Alcore

Mi porta è sbacca l'aria azurra
Hè l'alilongu arcanghjulatu
In l'alba stà longu tiratu
Mi gira in tondu à la primura

In paradisu un viaghjone
Sopra à l'acque di fiuminale
Linde chì correnu à l'agnone
Mi morgu è mi movenu l'ale

In mè si stende a volta scura
In l'acqua d'un pozzu turbatu
U tempu di l'eri affundatu
In terra sò lu volu umbratu
Alitu rossu in la bughjura

In paradisu un viaghjone
Sopra à l'acque di fiuminale
Linde chì correnu à l'agnone
Mi morgu è mi movenu l'ale

Spechju di luna

Spechju chjaru di luna
Per l'amanti allucinu
Oru in la notte bruna
Barcella di furtuna
Per sognu zitellinu
Spechju chjaru di luna...

E to stelle una à una
Sumeni in lu guaglinu
Oru in la notte bruna
Riflessu di laguna
U filu è lu caminu
Specghju chjaru di luna
Oru in la notte bruna.

Lagramante

Sò lagramante quante
Anime di a nebbia
Chì lagnanu lamenti
À l'ambarscia di u mondu
Spechju di a cunfina
È raglia di a storia
Cù e so sperenze frante
Senti d'oghje u lagnu ?
Sò l'agr'amante
Di a notte pellegrina
Stracquate in la memoria
Punente furibondu
D'idea senza dettu
Sò lagramante
Sò l'agr'amante.

Inchjostru

Inchjostru
Sangue nostru
Sognu viaghju o segnu
Gocchia à gocchia piuvana
Acqua per la moi terra
Moru frombu di mare
Sale u vechju rimbeccu
Mughja l'anticu mostru
Cù la primiera notte
In chjostru
Avvene chì ùn vi pare
Più vi risona l'ecu
Di u silenziu à a sarra
A speranza ci v'è
L'inchjostru ci si sparghje
In chjostru